



Broj: 03/1-50-14-7-11-9/15
Sarajevo, 3.11.2015.

PREDMET: Informacija o posjeti članova Zajedničke komisije za odbranu i sigurnost BiH Glavnom sjedištu Granične policije BiH, 1.10.2015.

Članovi Zajedničke komisije za odbranu i sigurnost BiH (u daljnjem tekstu: ZK) posjetili su 1.10.2015. Glavno sjedište Granične policije BiH (GPBiH) iz sastava Ministarstva sigurnosti BiH.

U delegaciji ZK bili su: Sifet Podžić, predsjedavajući, Hazim Rančić, Bariša Čolak, Hanka Vajzović, Mario Karamatić, članovi ZK, Ljiljana Milićević, sekretarka, i Željko Grubešić, stručni savjetnik.

Sastanku s članovima ZK u Glavnom sjedištu Granične policije BiH prisustvovali su: Zoran Galić, direktor, i Zijad Srabović, zamjenik direktora.

Radna posjeta Glavnom sjedištu Granične policije BiH obavljena je u skladu s Godišnjim planom rada za 2015. te u sklopu pripreme Pete sigurnosne konferencije koja će, u organizaciji Zajedničke komisije za odbranu i sigurnost BiH, biti održana 4. i 5. novembra 2015. godine.

Zoran Galić, direktor, i Zijad Srabović, zamjenik direktora Granične policije BiH, informirali su članove Zajedničke komisije o aktuelnom stanju u GPBiH.

U svojim izlaganjima istakli su da su po prijemu dužnosti obišli sve regionalne urede GPBiH i uvjerali se u aktuelno stanje na bh. granicama. Tokom svojih posjeta konstatirali su da su evidentne poteškoće u funkcioniranju u GPBiH jer su očekivali više profesionalnosti u radu, više rezultata i više organiziranih akcija na sprečavanju prekograničnog kriminaliteta.

Nakon uvida u stanje, a s obzirom na to da su obojica novoimenovani rukovodeći ljudi, započele su aktivnosti sređivanja kadrovske situacije, što je rezultiralo preraspodjelom radnih mjesta za oko 150 ljudi. Na tome nisu stali, tako da su idalje u toku horizontalna pomjeranja, a sve s ciljem veće efikasnosti u radu i postizanja boljih rezultata.

Prema riječima Galića i Srabovića, GPBiH je materijalno-tehnički dobro opremljena, ali su konstatali da je na pojedinim graničnim prijelazima izuzetno loša infrastruktura, da se puno novca izdvaja za iznajmljivanje objekata za smještaj regionalnih ureda, te da žele graničnu liniju učiniti mnogo sigurnijom. Planiraju prestrukturirati kapacitete i dalje unaprijediti saradnju s lokalnim zajednicama koje su na graničnoj liniji kao i s kantonalnim i entitetskim strukturama MUP-ova. Svjesni su značaja sigurnih granica i jačanja elemenata koji neće ugroziti sadašnji bezvizni režim. Apeliraju na predstavnike izvršne i zakonodavne vlasti da učine dodatne napore na poboljšanju infrastrukture na bh. granicama, za šta Uprava za indirektno oporezivanje BiH ima veliku odgovornost.

Kada je u pitanju popunjenost ljudstvom, konstatali su da prema sadašnjoj sistematizaciji nedostaje 480 policajaca. Granična policija BiH ozbiljno pristupa procesu prijema u službu, a izrazili su uvjerenje da prestrukturiranje kadrova u regionalnim uredima daje dobre početne rezultate.

Posebno se razgovaralo o aktuелnoj migrantskoj krizi, kapacitetima GPBiH i spremnosti njenih regionalnih ureda da odgovore izazovima koje je migrantska kriza prouzrokovala u regionu i šire. Istakli su i značaj dobre saradnje sa susjednim zemljama i njihovim nadležnim i komplementarnim službama. Također, u razgovoru su nekoliko puta potvrdili da je koordinacija u radu sa svim policijskim agencijama iz sastava Ministarstva sigurnosti BiH dobra i efikasna.

U razgovoru s čelnim ljudima GPBiH članovi Zajedničke komisije bili su u prilici da se uvjere u ozbiljan pristup problemima koji su posljedica migrantske krize. U vezi s tim, razgovarano je o sigurnosnom aspektu krize s kojom bi se naša država eventualno mogla suočiti, te značaju sigurnih graničnih linija.

Galić i Srbović su objasnili s koliko ozbiljnosti GPBiH učestvuje u radu novoimenovanog Koordinacionog tijela Vijeća ministara BiH za upravljanje aktuелnom migrantskom krizom kao i koordinaciji u radu policijskih i sigurnosnih agencija, kako onih iz sastava Ministarstva sigurnosti BiH tako i saradnje s nadležnim entitetskim i kantonalnim MUP-ovima.

Članovi Zajedničke komisije su nakon razgovora s direktorom i zamjenikom direktora GPBiH bili u prilici da razgovaraju i s njihovim najbližim saradnicima iz menadžmenta te se uvjerali da se vrlo ozbiljno prati svaki detalj u vezi s migrantskom krizom, te da svi subjekti u sektoru sigurnosti međusobno saraduju s ciljem iznalaženja adekvatnih rješenja. Instrukcije koje su dobili pripadnici GPBiH kroz operativni plan uozbiljile su način kontrole na graničnim prijelazima.

U vezi s pitanjem zaštite granica, saradnja u regionu ocijenjena je dobrom. Učestali su sastanci na ekspertnim nivoima, razmjene informacija su pouzdane i tzv. sjeverni i južni koridori za eventualne migrantske rute svakodnevno su predmet analize rizika.

Na kraju posjete članovi Zajedničke komisije dobili su čvrsta uvjerenja direktora Galića i njegovog zamjenika Srabovića da je stanje na bh. granicama dobro, da se očekuju još bolji

rezultati u otkrivanju prekograničnog kriminaliteta te da su svjesni da se budžetska sredstva uložena u GPBiH moraju opravdati isključivo rezultatima. Prema njihovim riječima, oni imaju mehanizme da ih sagledaju i vrednuju.

Predsjedavajući Zajedničke komisije

Sifet Podžić

Dostavljeno:

- naslovu
- a/a